

Broj predmeta: 01-05-03816-2019
Broj akta: 01EN-001
Gračanica, 2.10.2019.. godine

Z A P I S N I K
SA 4. SJEDNICE GRADSKOG VIJEĆA GRADA GRAČANICA

Održane dana 30. 08. 2019.godine u sali za sjednice nove zgrade Grada Gračanica sa početkom u 9,00 sati.

Sjednici je prisustvovalo 29 članova Vijeća.

Odsutan je bio vijećnik Mirzet Topčagić.

Pored članova Gradskog vijeća sjednici su prisustvovali: Gradonačelnik Nusret Helić, Gradski pravobranilac Imširović Jasminka, šefovi službi za upravu, Federalni poslanik Mirsad Čamdžić, član Etičke komisije Salkić Asja, te predstavnici sredstava informisanja.

Sjednicu je otvorio i istom predsjedavao Krajinović Nihad, predsjedavajući Gradskog vijeća Gračanica, zajedno sa zamjenikom Devedžić Almedinom i sekretarom Tukulj Dženanom.

Zapisnik vodio Iljazović Hazim, a vršilo se i tonsko snimanje sjednice.

Zapisnici sa 2. i 3. Sjednice Gradskog vijeća Gračanica usvojeni su jednoglasno.

Krajinović Nihad Predsjedavajući Gradskog vijeća je elaborirao prispjele odgovore na vijećnička pitanja i inicijative:

Na 03. Sjednici Gradskog vijeća Gračanica upućeno je 4 pitanja i 8 inicijativa.

Pristigli odgovori su slijedeći :

- Vijećnik **Mirza Džananović** inicirao je pokretanje postupka izgradnje semafora i pješačkih prelaza na nekoliko značajnih lokacija magistralnog puta M4. Iz Cesta FBiH odgovaraju kako je stručna služba ovog preduzeća razmatrala navedenu inicijativu i utvrdila da se ranije izrađenim projektom već radilo na ovoj dionici a da planom poslovanja za 2019.godinu traženo nije planirano.
- Vijećnik **Demir Milkić** upitao je kada će se riješiti problem putne infrastrukture u naselju Čiriš nakon rekonstrukcije kanalizacione

infrastrukture. U odgovoru je navedeno da je navedeni projekat u međuvremenu u potpunosti završen.

- **Alen Ibrišević** PU Gračanica uputio je inicijativu da patrole policije u jutarnjim satima regulišu saobraćaj na izlazu iz MZ Stjepan Polje na mag.cestu. Iz PU Gračanica odgovorili su kako, imajući u vidu kapacitet ljudskih resursa, nije moguće svakodnevno u isto vrijeme na svim raskrsnicama objezbjediti prisustvo patrola policije no da će policija i dalje poduzimati sve u svojim mogućnostima kako bi se osigurala bezbjednost svih učesnika u saobraćaju.
- **Vahid Bajrić** inicijativom se obrati Gradonačelniku, nadležnim službama kolegama vijećnicima i drugim kako bi se trajnije i kvalitetnije riješili uzroci plavljenja stambenih i privrednih objekata i infrastrukture u djelovima MZ Orahovica Donja. U odgovoru nadležne službe navedene su aktivnosti Službe za civilnu zaštitu oko utvrđivanja nastalih šteta i nadležne službe u iznalaženju rješenja ovog problema.
- Vijećnik **Halid Ahmetović** uputio je pitanje kada i kako će se riješiti ponovno aktivirano klizište na putnom pravcu Monj, ispod doborovačke džamije. U odgovoru nadležne službe navode se poduzete aktivnosti na utvrđivanju stanja i otklanjanju nastalog oštećenja.
- Vijećnik **Almedin Devedžić** još jednom je aktuelizirao problem nepovratnih informacija na vijećnička pitanja i inicijative, između ostalih i ličnih a koje se odnose na status puta Malešići-Lukavica. Iz direkcije Cesta TK pristigao je odgovor sa odredbama člana zakona koji reguliše ovo pitanje, naglašavajući da je ova cesta zadržala status lokalne ceste jer Vlada FBiH još uvijek nije donijela odluku o prekategorizaciji puteva u Federaciji.
- Na ostala pitanja i inicijative sa 3.sjednice Gradskog vijeća do ovog trenutka odgovori nisu pristigli, ali su pristigli odgovori na neka ranije postavljena pitanja kao što su :
- Odgovorom na pitanje vijećanika Edina Šehića u vezi sa Turističkom zajednicom Grada Gračanica navode se razlozi u zastoju osnivanja iste,.
- Na kandidovano pitanje vijećnika Fadila Mešića o kontroli rada za praznike i isticanja državnih obilježja odgovor je stigao iz kantonalne uprave za inspeksijske poslove TK. U odgovoru su navedene informacije o poduzimanju mjera protiv prekršitelja zakona glede ovog pitanja.
- Vijećnik Demir Milkić uputio je inicijativu za besplatnu internet konekciju u centru grada. Odgovorom je navedeno kako je ovo jedna od aktivnosti Grada kao turističkog sadržaja te da se u okviru projekta

postavljanja kamera u gradu otvara mogućnost korištenja infrastrukture i proširenja internet signala.

- Inicijativa vijećnika Vahidina Smajlovića JP „Vodovod i kanalizacija“ u cilju rješavanja vodosnabdjevanja djela stanovništva MZ Škahovica, također je upućena nešto ranije. Iz ovog preduzeća poslali su odgovor u vidu nekoliko zaključaka.

Nova pitanja i inicijative postavili su vijećnici:

Hadžić Nejra:

“Inicijativa za obilježavanje parking prostora i postavljanje upozorenja zbog nesavjesnog parkiranja ispred J.U. Opća bolnica “Dr. Mustafa Beganović” i Doma zdravlja Gračanica.

Poštovani,

Upućujem vijećničku inicijativu nadležnim službama za obilježavanje parking prostora ispred bolnice i Doma zdravlja u Gračanici kao i postavljanje upozorenja od nadležnih organa za pravilno parkiranje u označenom prostoru za parking.

Obrazloženje:

Svjedoci smo svakodnevnog odlaska naših sugrađana u bolnicu ili Dom zdravlja, gdje im se često desi da nisu u mogućnosti parkirati auto i to ne zbog nedostatka parking prostora nego zbog neobilježenih (izbljedjelih) parking mjesta i zbog nesavjesnih građana koji parkiraju nepropisno, što možemo vidjeti i na prikazanim fotografijama.

Stoga bi zamolila nadležne službe da postupe urgentno po naprijed navedenom i obilježe parking prostor sa postavljenim upozorenjem o snošenju sankcija za nepropisno parkiranje, te obezbijede adekvatan nadzor od strane nadležnih organa”.

Fadil Mešić:

“Gradonačelniku Nusretu Heliću, podnosim sljedeću vijećničku inicijativu:

Tražim da gradonačelnik Gračanice Nusret Helić, sa svojim saradnicima, pokrene aktivnosti na postavljanju trajnog obilježja cvijeta “Sjećanje Srebrenica” u parku ispred Medrese Osman-Kapetana Gradašćevića.

Obrazloženje:

Cvijet “Sjećanje Srebrenica”, koji je dizajniralo Udruženje Gračaničko keranje, uistinu je postao simbol nevinosti, stradanja, genocida, ali i cvijet nade. Zahvaljujući pomenutom udruženju, ovaj simbol je prezentiran u cijelom svijetu, a raznim prigodama nose ga najpoznatiji zvaničnici svijeta, pa tako i u Bosni i Hercegovini.

Zbog toga je neshvatljivo da Gračanica, u kojoj je kao što rekoh nastao “cvijet Sjećanje”, nema njegovo obilježje, kakvo zaslužuje. Tokom poslednje komemoracije 11. Jula 2019. godine u Srebrenici, javno preduzeće “Komus” je od neadekvatnog materijala, u parku ispred medrese postavilo nešto kao instalaciju cvijeta “Sjećanje na Srebrenicu”. Bolje je bilo i to nego da nemamo ništa, ali na tom mjestu po mom dubokom uvjerenju, ali i u razgovoru sa građanima, ovdje treba postaviti trajno obilježje ovog simbola.

O tome, koje veličine, od kojeg materijala izgraditi cvijet, kakvog dizajna, mišljenje treba da da struka. Sve ovo bi trebalo biti završeno prije naredne komemoracije u Potočarima 11. Jula 2020. godine i na taj dan ga otvoriti.

Na ovaj način žene Gračanice, koje svakog 11. Jula organiziraju šetnju gradom i odaju počast žrtvama genocida Srebrenice, imale bi mjesto gdje će se okupiti i podsjetiti se na strahore koje su se desile genocidu u Srebrenici”.

Smajlović Vahidin:

“Vijećnička inicijativa je upućena JU “Direkcija regionalnih cesta TK”

Inicijativa se odnosi na uvrštenje u budžet Direkcije za ceste TK za 2020.godinu za proširenje ulaza u MZ Škahovica-skretanje sa regionalnog puta Gračanica-Srnice.

Ovu inicijativu sam već uputio 29.11.2017.godine i u odgovoru od Direkcije regionalnih cesta TK dana 18.12.2017.godine je naznačeno da će se u plan rada za 2018.godinu u skladu sa finansijskim mogućnostima uvrstiti izrada projektne dokumentacije za proširenje navedene raskrsnice.

Obzirom da nemam informaciju dali su poduzete neke aktivnosti po ovoj inicijativi, obnavljam istu sa zahtjevom da se u ovoj godini predvide sredstva za izradu projekta, a da se u 2020.godini planiraju sredstva za realizaciju projekta.

Ja sam ovdje naveo obrazloženje ali ne bih ga sada čitao s obzirom da je ponovljena inicijativa ali radi se zaista o jednom dosta nepreglednom ulazu i zlazu iz MZ Škahovica koji je opasan naročito zimi zbog visine zida. Nema tu dovoljno ni bankine i svakako otežava zaista svim učesnicima u saobraćaju.

Ne znam dali ima na području TK i jedna MZ sa ovako lošim ulazom i zbog toga mislim da zaista inicijativa zaslužuje pažnju i ja se nadam da će Direkcija regionalnih cesta TK imati sluha i uzeti ovu inicijativu ozbiljno u razmatranje”.

Sulejmanović Osman:

“Inicijativa. Upućena je Gradonačelniku da pokrene postupak izrade Urbanističkog plana za područje izletišta Vis u Babićima.

Izletište Vis u Babićima svakim danom postaje sve više posjećeno i povećava se interes za gradnju na samom izletištu i oko njega.

Trenutno je na snazi zabrana gradnje na dijelu izletišta - Odluka o zaštiti područja VIS-a. Da ne bi došli u situaciju da odbijamo potencijalne investitore molim Gradonačelnika da prihvati ovu inicijativu i pokrene izradu Urbanističkog plana kako bi ovo područje planski uređivali i koristili”.

Demir Milkić, podnio je dvije vijećničke inicijative i jedno vijećničko pitanje:

“Vijećnička inicijativa.

Pokrećem inicijativu za izgradnju projektne dokumentacije i rješenja vodovodne mreže u naselju Lendići (dio kod Kamenoloma).

Obrazloženje:

Inicijativu upućujem J.P. VIK i nadležnim službama.

Naime, mještani naselja Lendići (od izlaza iz Ul. Braće Fazlića do Kamenoloma) nisu obezbijedeni vodom te tu ne postoji nikakva vodovodna mreža. Ovo područje obuhvata oko 25 domaćinstava gdje živi do 100 ljudi. Na sastanak sa sugrađanima sam pozvan 10.08., gdje ih se skupilo 50-ak te su mi prezentovali ovaj problem i zamolili da se krene sa mrtve tačke a to je svakako projektno riješeno, svjesni su da to nije problem koji se rješava preko noći. Takođe su spremni učestvovati finansijski u rješavanju ovog problema.

Molim nadležne da pristupe izradi projektne dokumentacije kako bi se moglo aplicirati za izdvajanje u narednom budžetu ili prema nadležnom ministarstvu

Moja inicijativa se odnosi na izradu arhitektonske skulpture “I <3 GRAČANICA” u centru grada (Ulica Alije Izetbegovića ili neki vidikovac tipa turistička destinacija VIS). Ideja je preuzeta iz većih evropskih metopola gdje takve instalacije predstavljaju turističku atrakciju. Prvi oblik takve instalacije je postavljeno još davne 1910.godine u Los Angelesu koji je i danas poznat po čuvenim slovima Hollywood. Zatim, možete vidjeti i u velikom broju velikih metopola poput Amsterdama, a prije neki dan je instalirano i u samom Sarajevu. Gradovi sa ovim instalacijama postaju prepoznatljiviji i turistički atraktivni. Hvala na ovim instalacijama.

Vijećničko pitanje:

S obzirom da nam se bliže dani tradicionalnog vašera zanima me postoji li mogućnost instaliranja javnog WC-a u ta tri dana kako bi izbjegli neugodne prizore i situacije?”.

Saša Operhal:

“Vijećnička inicijativa:

Na zahtjev stanovnika Lipe podnosim sljedeću vijećničku inicijativu:

Na potezu od mrtvačnice pa do raskršća na Lipi uopšte ne funkcioniše rasvjeta odnosno ista ne postoji. Ovo stanje prema riječima stanovnika traje više od tri godine. Napominjem da na pomenutom potezu postoje rasvjetni stubovi ali na njima nema rasvjetnih tijela. Kako prolazak u noćnim satima za sve stanovnike ne bi bio jeziv tražimo da se ova dionica propisno osvijetli”.

Mirza Džananović:

“Kada će biti realizovana vijećnička inicijativa koju sam podnio nadležnim službama 30. 01. 2019.godine?

Inicijativa je vezana za postavljanje vertikalno horizontalne signalizacije u blizini škole u MZ Pribava. S obzirom da u ponedjeljak počinje nastava, a još nije realizovana ova inicijativa, mislim da je vrijeme da se realizuje. Hvala”.

Alen Ibrišević, podnio je 2 vijećničke inicijative:

“Upućujem inicijativu J.P. “Komus” da izvrši uređenje zelene površine u ulici Branilaca grada, tačnije na ulazu u Grad Gračanicu ispod Feringa.

Obrazloženje:

Pomenuta površina koja se pruža od semafora, pa do benzinske pumpe Energopetrol, je zarasla u nisko rastinje i travu, koju evidentno niko ne održava. Pomenuta površina nalazi se na ulazu u Grad te samim time daju ružnu sliku o našem Gradu.

Upućujem inicijativu nadležnoj gradskoj službi da pristupi izradi Adresnog registra Grada Gračаницe.

Obrazloženje:

Adresni registar podrazumijeva adresiranje svih objekata na području cijelog Grada, uz uspostavu elektronske baze. Do sada su adresnim brojevima obilježeni samo objekti u užem dijelu grada, dok objekti u seoskim sredinama nisu obilježeni. Brojne općine u BiH su već izvršile izradu Adresnog registra, te smatram da sada kada smo dobili Statut Grada neophodno je da i Grad Gračаницa pristupi izradi istog”.

Edin Šehić podnio je dvije vijećničke inicijative i jedno vijećničko pitanje:

Na osnovu člana 23. i 46. Statuta Grada Gračаницa, upućujem vijećničku inicijativu:

Zabrana prosjačenja u užem jezgru Grada i na svim javnim mjestima gradskog područja.

Obrazloženje:

Od nedavno Gračаницa dobi status Grada, a složit ćemo se puno još stvari treba unaprijediti da se to zaista vidi i osjeti. Ono što mene, a vjerujem i mnoge građane smeta i iritira jeste prosjačenje gotovo na svakom koraku, a o užem jezgru grada i gradskog šetališta da i ne govorimo. Mi smo se pomalo i navikli, ali je zaista ružna slika za goste koji po prvi puta posjećuju naš grad, da ih na svakom koraku čeka neki prosjak. O socijalno ugroženim kategorijama stanovništva imamo institucije koje o tome vode brigu u zakonskim okvirima, prosjačenje je takođe zakonom zabranjeno, a u izuzetnim slučajevima nadležni organi izdaju odobrenja za organizaciju prikupljanja pomoći na javnim površinama, međutim ono što imamo trenutno u našem gradu zaista zabrinjava i šalje ružnu sliku. Stoga tražim od

relevantnih institucija da promptno djeluju u cilju suzbijanja prosjačenja u našem gradu, da sankcionišu sve prekršioce zakona i trajno zabrane prosjačenje u užem jezgru grada.

Gradska uprava kao alternative može odrediti određeni prostor van užeg jezgra grada kao dozvoljena mjesta za organizovana prikupljanja pomoći, naravno uz donesenu saglasnost nadležnog organa.

Ovu inicijativu upućujem Gradonačelniku, J.U. Policijska stanica Gračanica i Centru za socijalni rad.

Na osnovu člana 23. i 46. Statuta Grada Gračanica, upućujem vijećničko pitanje:

Šta se uradilo i šta se planira uraditi po pitanju rješavanja pristupa Starom gradu/gradini u Sokolu, jednom od 9 nacionalnih spomenika sa područja Gračanice, ujedno i najugroženijim?

Obrazloženje:

Jedan od bisera našeg područja, sada i Grada Gračanice jeste Stari grad/gradina u Sokolu, koja je jedna od devet nacionalnih spomenika područja Gračanice, prema evidenciji Zavoda za zaštitu i korištenje kulturno-historijskog i prirodnog naslijeđa Tuzlanskog kantona. Na žalost, jednom ovako značajnom historijskom spomeniku, koji se veže za posjed Kotromanića, prema istraživanju sagrađen krajem 14. i početkom 15. stoljeća, trenutno se pridaje veoma malo pažnje. Prema predajama, Starom gradu se prilazilo sa sedla, tj. sa sjeveroistoka, na kojem je smještena stara džamija, ispod sjevernih padina stijene na kojoj je grad. Džamija je obnovljena kao nacionalni spomenik, ali gradina je prepuštena vremenu, tačnije potpuno je onemogućen prilaz istoj, jer da bi se do zidina gradine i same unutrašnjosti Starog grada došlo, moguće je samo kroz privatni posjed, čiji vlasnik često i zabranjuje prolaz do zidina gradine. Na koji način je privatiziran prolaz, na koji način su izgrađeni stambeni objekti i čijom dozvolom u neposrednoj blizini ovog značajnog spomenika, pitanja su na koja treba tražiti odgovor, iako jedno od značajnih pitanja je kako riješiti prilaz gradini, kako je restaurirati koliko je to moguće i ponoviti svim posjetiocima, turistima, istraživačima, arheolozima i slično da ispitaju, njeguju i ističu važnost ovog historijskog nacionalnog spomenika, kao jednog od važnih historijskih naslijeđa i turističkih potencijala ovog kraja. Ovaj veoma bitan historijski nacionalni spomenik je na žalost među tri najugroženija nacionalna spomenika u cijeloj Bosni i Hercegovini, što je još jedan od dokaza našeg nemara i nezainteresovanosti da naše izvorno blago njegujemo i oplemenimo.

Na osnovu člana 23. i 46. Statuta Grada Gračanica, upućujem vijećničku inicijativu:

Za kupovinu objekta na izletištu Vis, kojeg je potrebno privesti namjeni za potrebe razvoja turizma i samog izletišta, kao i zbog svog strateškog položaja i korisnosti.

Obrazloženje:

Izletište Vis iz godine u godinu poprima sve veći značaj kao jedno od najboljih destinacija za odmor i rekreaciju za sve posjetioce. Sadržaji koji su ponudeni na izletištu zaslužuju svoju plansku (sistemsku) upotrebu i održavanje, a jedan od preduslova za to je polazna INFO tačka, na kojoj se svi posjetioци mogu informisati o ponudi izletišta, rezervisati svoje termine za korištenje sportskih terena, a svakako da se time otvara prostor za dodatne sadržaje koji se mogu nuditi. Objekat koji se nalazi na jednoj od strateških najboljih pozicija ovog izletišta i koji je idealan za INFO tačku, ponuđen je za prodaju i mišljenja sam da Grad Gračanica treba da kupi taj objekat i stavi ga na raspolaganje, naravno kao društvenu imovinu, Turističkoj zajednici Grada Gračanica, koja bi na najbolji mogući način iskoristila korištenje iste, s ciljem razvoja turizma ovog područja. Navedeni objekat, zahvaljujući susretljivosti i razumijevanju vlasnika, uvijek je stavljen na raspolaganje i korištenje svim grupama, udruženjima i slično, za njihove aktivnosti na izletištu Vis. Više godina za redom sadržaje ovog objekta za realizaciju projekata od šireg društvenog značaja koristili su U.M. Sijedi Krš Babići, Vijeće mladih općine Gračanica, kao i druge neformalne grupe, što je još jedan od dokaza i potreba za jednim ovakvim objektom na trenutno jednom od strateških važnih izletišta za sve stanovnike Grada Gračanica”.

Vahid Bajrić, podnio je dvije vijećničke inicijative:

“Inicijativa za hitnu sanaciju magistralne ceste M4 Doboj-Tuzla u MZ Donja Orahovica-Centar.

Poštovani,

Obraćam vam se sa inicijativom za hitnu sanaciju magistralne ceste M4 Doboj-Tuzla u MZ Donja Orahovica-Centar na kojoj su vidljiva velika oštećenja u vidu udarnih rupa i izbočina što ugrožava sigurnost vozača, pješaka i mještana koji stanuju u neposrednoj blizini magistralne ceste.

Vas molimo da HITNO uputite nadležne službe da izađu na mjesto prijave i HITNO djeluju na sanaciji iste, a u cilju zaštite vozača motornih vozila, pješaka i stanovnika ove mjesne zajednice.

Unaprijed se zahvaljujem.

Inicijativa za obezbjeđenje finansijskih sredstava za sanaciju kanalizacije i odvođenja oborinskih i fekalnih voda u MZ Gornja Orahovica, zaseok Gazibegovići.

Poštovani,

Obraćam vam se sa inicijativom za obezbjeđenje finansijskih sredstava za sanaciju kanalizacije i odvođenja oborinskih i fekalnih voda u MZ Gornja Orahovica, zaseok Gazibegovići koje svojim djelovanjem plave i slivaju se pored stambenih objekata. Na kanizacionim cijevima zbog slijeganja terena i uticaja došlo je do smicanja, pomjeranja i zatrpavanja cijevi, čime onemogućavaju odvodnju otpadnih voda i ugrožavaju stanovnike stambenih objekata.

Vas molim da HITNO u saradnji sa Predsjednikom MZ Gornja Orahovica i nadležnim službama pomognete u rješavanju gore navedenih problema.

Unaprijed se zahvaljujem”.

Džemal Jukan:

Pokrećem inicijativu za nastavak uređenja korita rijeke Sokoluše na potezu od kružnog toka do tehničkog pregleda “Lido”.

Obrazloženje:

Obzirom da je kružni tok završen davno, ne postoje nikakve smetnje da se uređenje nastavi. Znamo da su neka sredstva obezbijedena i od viših nivoa a iz budžeta i mislim da je ta dionica ostala koja bi se morala uraditi u narednom periodu”.

Nihad Krajinović:

“Putem web stranice na Stručnu službu Vijeća stiglo je pismo kojeg koristimo u cjelosti, a vezano je za sanaciju puta u Bijelim Poljima.

Poštovani vijećnici,

Zanima me da li se ima u planu u skorije vrijeme raditi nastavak puta u Bijelim Poljima i da li postoji mogućnost da se što prije, tj. prije dolaska jeseni i obilnih kiša uradi barem odvodnja oborinskih voda. Radi se o otprilike 200 metara puta, koji nakon svake kiše bude u katastrofalnom stanju, zbog nepostojanja adekvatnog sistema za prikupljanje kišnice i ostalih voda.

Nadam se da postoji mogućnost da se uradi barem to, ukoliko nema dovoljno sredstava za ostatak.

Grupa građana ulice Podgaj uputila je zahtjev za rješenje problema zapaljene zgrade Doma na Gaju.

Obraćamo vam se ko zna koji put, da se riješi problem okupljanja kriminogenih osoba u zapaljenom Domu na Gaju.

Obrazloženje:

Mi građani gornjeg Podgaja obraćamo vam se da svako iz svoje nadležnosti, poduzme mjere i riješi problem okupljanja kriminogenih osoba u zapaljenom Domu na Gaju, kako ne bi došlo do činjenja najtežih krivičnih djela i kako bismo mi imali miran život. Ovim što se sada dešava u ovoj zgradi, koja je i ruglo grada, ugrožena je naša sigurnost, posebno sigurnost djece, ali i naš mir i ljudsko dostojanstvo.

U ovoj napuštenoj zgradi u posljednje vrijeme naselilo se na desetine osoba koji svojim drskim ponašanjem, psovkama, vikom, vrijeđanjem, ugrožavaju naš mir. Ove pojave su posebno izražene od 18 sati, pa do duboko u noć. U jednoj od napuštenih prostorija se vrši javna prostitucija, konzumira alkohol i droga. Česte su i tuče. Osobe se dovoze neregistrovanim vozilima, pa se jurnjavom niz padinu, ugrožavaju naši životi. Nekoliko vozila je do sada sletilo sa puta. Na naše kuće ove osobe bacaju se kamenjem, niz stranu guraju zaostale betonske žardinjere, teške 150 kilograma i velike kamene gromade.

Mi smo više puta o ovom problemu obavještavali Policijsku upravu, čija je patrola izlazila na lice mjesta, ali se problem nije pomakao sa mjesta. Svaki, pa i ovaj problem se, ako ima dobre volje može riješiti. Napominjemo da se ovo dešava, kojih dvadesetak metara dalje od glavnog bazena za pitku vodu grada i 200 metara od SOS Dječijeg sela. Po našem mišljenju, ulazna vrata ovog napuštenog objekta treba zazidati, policija da ga treba obilaziti 2-3 puta sedmično. U protivnom, mi ćemo biti prinuđeni preduzeti sve mjere, kako bi smo se sami zaštitili od nesnošljive situacije u Domu na Gaju i njegovoj okolini”.

Prisutnima se obratio Federalni poslanik Mirsad Čamdžić:

„Neću naravno dužiti s obzirom da imate obiman dnevni red i vidim da ste se odmorili, da je vrlo aktivno nakon godišnjih odmora barem što se tiče uvoda i ovih vijećničkih pitanja. Želim da iskoristim ovu priliku i ovu cijenjenu govornicu i da iskoristim vas i svoju trenutnu poziciju i da vas direktno, otvoreno i javno sa ovog mjesta pozovem na lobiranje za Grad Gračanicu. Naime opći izbori su završeni prije deset mjeseci. Prvi puta Gračanica u Federalni parlament plasirala je četiri zastupnika, po onome što vidimo u dosadašnjem radu, mi smo tamo u parlamentu naravno ideološki i stranački, interesno i na druge načine podijeljeni, ali želim da vas podsjetim kada je Grad Gračanica u pitanju da takvih podjela uopšte nema niti ih treba biti. Stoga bih zamolio Gradonačelnika, rukovodstvo Gradskog vijeća, kolege da promovišu teme, da naprave ono što smatraju kao prioritete s kojima se mi možemo baviti u Federalnom parlamentu. Mi smo do sada imali desetak sjednica Federalnog parlamenta, što redovnih, što vandrednih, što tematskih i ja sam imao priliku vidjeti kod drugih općina da su oni izuzetno aktivni bez obzira da li se to radi recimo o DF, HDZ, ako su iz Čapljine da imaju neke zajedničke nastupe kada je Čapljina u pitanju. Mislim da imamo kapacitet da isto tako, ne samo direktno na sjednicama da promoviramo Gračanicu. Mi imamo u ovom trenutku naši Federalni zastupnici iz Gračanice bez obzira na stranku pristupe i nacionalnim medijima, imamo govornicu za kojom se to može čuti. Ja znam da će sada krenuti ova lokalna kampanja, da će biti lokalne politike, međutim kada je Grad Gračanica u pitanju smatram da možemo postići koncezus. Ja za ovih deset mjeseci nikakvu vezu sa vama, što i mojom, što i vašom greškom nisam dobio nikakvu inicijativu a vjerujte da itekako ima prostora da nas četiri kao zastupnika iz različiti političkih stranaka možemo otići i do premijera, prisustvovati raznim komisijama ali trebamo imati nekakve inpute, trebamo imati nekakav sastanak i dogovoriti se šta je to što bi mi trebali bez obzira na interese politike, stranke i slično trebali gurati kada je Gračanica u pitanju. Ovo je prvi puta u historiji da Gračanica ima svoja četiri poslanika. Ako se nastavimo ovako ponašati možemo imati dvadesetčetiri na ovakav način i ništa nam to neće pomoći. Dakle, imamo četiri poslanika u Zastupničkom domu parlamenta Federacije što znači skoro 5 % parlamenta pripada Gračanici. Ja vas pozivam direktno i otvoreno ovdje da svi to zajedno iskoristimo bez obzira da li ćete plasirati kroz svoje stranke na određene načine neke druge politike, ali ono što je kapitalno za Gračanicu da mi to promoviramo i kod premijera i kod ministara i kod drugih ljudi i zato vam mogu slobodno reći u ime ostale trojice kolega iz Federalnog parlamenta uvijek otvoreni pa vas evo pozivam da u tom smijeru radite i da možda imate jednu tačku u kojoj bih se

odredila dva, tri prioriteta kako bih smo imali i mi nekako zajedničko uže bez obzira na stranke kako da djelujemo kada je Grad Gračanica u pitanju, šta su to prioriteti i slično.“

Nihad Krajinović, predsjedavajući Gradskog vijeća:

“Mi nastavljamo dalje. Isrcpili smo pitanja i inicijative i sada prelazimo na dnevni red sjednice Gradskog vijeća.

U materijalu ste dobili dnevni red sa ove sjednice koji je utvrdio Kolegij Gradskog vijeća i otvarajući raspravu o ovom dnevnom redu, samo da upoznam ostale kolege vijećnike koji nisu upućeni.

Kolegij je zasijedao u holu i suglasili su se da još jednu tačku uvrste na dnevni red ali skidamo dvije tačke, a to će biti 10. i 11. Znači 10. Donošenje rješenja o razrješenju privremeno imenovanog člana Upravnog odbora u JZU “Gradska apoteka” Gračanica i 11. Donošenje rješenja o imenovanju člana Upravnog odbora JZU “Gradska apoteka” Gračanica iz reda Ministarstva zdravstva TK.

Dobili smo informaciju da je Vlada TK donijela Odluku da obustavlja sva imenovanja i nadzorne odbore u javnim ustanovama na području TK. Pa evo da ni mi onda ne žurimo, a ovu Odluku o imenovanju mi nismo ni dobili ranije u Stručnu službu i s obzirom da je Gradonačelnik predlagatelj on je se saglasio da se ove dvije tačke povuku sa dnevnog reda. Naravno vi i svi ostali glasate pa ćemo vidjeti, a da kažem da ćemo jednu tačku uvrstiti a u pitanju je Odluka o prestanku i dodjeli mandata članovima Vijeća MZ Donja Orahovica i ona bih bila deseta tačka”.

Dajem na glasanje ovaj prijedlog Kolegija da se uvrsti kao 10. Tačka Odluka o prestanku i dodjeli mandata članovima Vijeća MZ Donja Orahovica”.

Prijedlog je jednoglasno prihvaćen.

Konačan dnevni red glasi:

1. ODLUKA O IZMJENAMA I DOPUNAMA BUDŽETA GRADA GRAČANICA ZA 2019. GODINU

Izjavitelj: Nusret Helić, Gradonačelnik.

2. RAZMATRANJE I USVAJANJE IZVJEŠTAJA O IZVRŠENJU BUDŽETA ZA PERIOD 01. 01. - 30. 06. 2019. GODINE

Izjavitelj: Nusret Helić, Gradonačelnik.

3. RAZMATRANJE I USVAJANJE IZVJEŠTAJA O UTROŠKU BUDŽETSKE (TEKUĆE) REZERVE ZA PERIOD 01. 01. - 30. 06. 2019. GODINE.

Izjavitelj: Nusret Helić, Gradonačelnik.

4. RAZMATRANJE I USVAJANJE LOKALNOG AKCIONOG PLANA ZA RE/INTEGRACIJU BH DRŽAVLJANA KOJI SE VRAĆAJU PO OSNOVU SPORAZUMA O READMISIJI NA PODRUČJE GRADA GRAČANICA ZA PERIOD 2019. - 2022. GODINA.

Izjavitelj: Alma Buljubašić, Pomoćnik Gradonačelnika.

5. RAZMATRANJE I USVAJANJE PRIJEDLOGA ODLUKE O OSNIVANJU GRADSKOG ŠTABA CIVILNE ZAŠTITE.

Izjavitelj: Mustafa Bajić, Pomoćnik Gradonačelnika.

6. RAZMATRANJE I USVAJANJE PRIJEDLOGA ODLUKE O VISINI

NAKNADE PREDSEDNICIMA VIJEĆA MJESNIH ZAJEDNICA.

Izvjestilac: Dženana Tukulj, Sekretar.

7. RAZMATRANJE I USVAJANJE PRIJEDLOGA ODLUKE O VISINI PLAĆE I NAKNADA IMENOVANIM DUŽNOSNICIMA U REGULIRANIM TIJELIMA GRADA GRAČANICA.

Izvjestilac: Dženana Tukulj, Sekretar

8. RAZMATRANJE I USVAJANJE ODLUKE O PRODAJI NEKRETNINA

Izvjestilac: Aida Hodžić, Pomoćnik Gradonačelnika.

9. RAZMATRANJE I USVAJANJE PRIJEDLOGA ODLUKE O PROMJENI STATUSA JAVNOG PUTA.

Izvjestilac: Aida Hodžić, Pomoćnik Gradonačelnika.

10. ODLUKA O PRESTANKU I DODJELI MANDATA ČLANOVIMA VIJEĆA MZ DONJA ORAHOVICA

Izvjestilac: Nihad Krajinović, Predsjedavajući Gradskog vijeća

11. DONOŠENJE RJEŠENJA O RAZRJEŠENJU ČLANA KOMISIJE ZA PROPISE I STATUT, IZBOR I IMENOVANJA, GRADSKA PRIZNANJA I OBILJEŽAVANJE ZNAČAJNIH DOGAĐAJA I LIČNOSTI.

Izvjestilac: Hasan Puškar, Predsjednik Komisije.

12. DONOŠENJE RJEŠENJA O IMENOVANJU ČLANA KOMISIJE ZA PROPISE I STATUT, IZBOR I IMENOVANJA, GRADSKA PRIZNANJA I OBILJEŽAVANJE ZNAČAJNIH DOGAĐAJA I LIČNOSTI.

Izvjestilac: Hasan Puškar, Predsjednik Komisije.

13. RAZMATRANJE I USVAJANJE IZVJEŠTAJA O PROCIJENJENOJ ŠTETI OD PRIRODNE NESREĆE UZROKOVANE POPLAVAMA VODOTOKA I i II KATEGORIJE NA PODRUČJU DIJELA GRADA GRAČANICA U PERIODU OD 01. 06. 2019. - 27. 06. 2019. GODINE.

Izvjestilac: Mustafa Bajić, Pomoćnik Gradonačelnika.

14. RAZMATRANJE I USVAJANJE IZVJEŠTAJA O OSTVARENJU GODIŠNJEG PLANA IMPLEMENTACIJE STRATEGIJE RAZVOJA OPĆINE GRAČANICA ZA 2018. GODINU.

Izvjestilac: Fernada Helić - Čamdžić, Šef Odsjeka.

15. RAZMATRANJE INFORMACIJE O AKTUELNIM PRIVREDNIM KRETANJIMA NA OPĆINI GRAČANICA U 2018. GODINI.

Izvjestilac: Fernada Helić - Čamdžić, Šef Odsjeka.

Kompletan dnevni red je dat na glasanje. Dnevni red jednoglasno je usvojen.

Prešlo se na rad po dnevnom redu:

TAČKA 1

ODLUKA O IZMJENAMA I DOPUNAMA BUDŽETA GRADA GRAČANICA ZA 2019.GODINU.

Nusret Helić, Gradonačelnik Grada Gračanica:

„Uvaženi predsjedavajući, radno predsjedništvo, poštovani vijećnici, gosti i mediji, sve vas pozdravljam i želim uspješan rad.

Pred vama su Izmjene i dopune Budžeta za 2019. godinu.

Kako je to Zakon o budžetima u Federaciji BiH regulisao izmjenama i dopunama se ponovo uravnotežuju prihodi i primici, odnosno rashodi i izdaci, a nakon što se dese određene devijacije u prihodima, odnosno rashodima.

Zašto rebalans našeg Budžeta? Zbog povećanja prihoda i primitaka, te iskazanog većeg viška prihoda iz prošle godine. Ako se sjećate da smo u Budžet uvrstili procijenjeni višak prihoda u iznosu 1.300.000 KM, a po izvršenju budžeta on je bio veći i iznosi 2.152.242 KM. Takođe, se ukazala potreba za većim izdacima na pojedinim stavkama, uključujući i kapitalne projekte, ali i nekih novih stavki i projekata bilo zbog stvarne potrebe ili zbog namjenski odobrenih sredstava.

Prema Rebalansu Budžet bi iznosio 16.938.093 KM i veći je za 1.059.819 KM od ranijeg važećeg koji je sa uvrštenim namjenskim sredstvima iznosio 15.878.474 KM.

Kao što rekoh do povećanja je došlo prije svega zbog većeg viška prihoda iz prošle godine, te većih poreznih i neporeznih prihoda. Dobro je da mi rebalans radimo zbog viška sredstava, te možemo neke stavke isfinansirati prema stvarnim potrebama, kao i neke nove potrebne projekte iz infrastrukture.

Bilo bi daleko teže da su nam rashodi veći od prihoda i da moramo neke rashode kresati ili se odricati nekih projekata.

Bez obzira što vam u materijalu ima i obrazloženje, ima potrebe da i ja kao predlagач dam dodatna obrazloženja i pojasnim neke stavke i izdatke.

Kada su u pitanju prihodi i primici mislim da nema nejasnoća. Oni su planirani na osnovu zadnjeg poznatog ostvarenja, naše procjene ostvarenja do kraja godine, procijenjenih grantova, te poznatog viška prihoda iz prošle godine.

Prihodi su veći za 343.377 KM, od čega porezni za 161.999 KM, neporezni za 109.718 KM, a grantovi za 71.660 KM. Da se razumijemo, ovdje se radi o procjenama i planu nadajući se da neće doći do devijacija u posljednjem tromjesečju. Obrazloženje za svaku vrstu prihoda ima u materijalu, kao i na što se odnose namjenska odobrena sredstva.

Što se tiče rashoda i izdataka oni su planirani na bazi posljednjeg poznatog izvršenja, izdatih rezervacija, grantova viših nivoa vlasti, provedenih procedura i potpisanih ugovora, procjene kretanja izdataka do kraja godine, te potrebom za nekim novim projektima.

Ukupni rashodi i izdaci planirani su u iznosu od 16.938.093 KM, koliko i planirani prihodi i primici.

Ukupni tekući izdaci su veći za 537.176 KM, a odnose se na veća sredstva za plaće i naknade zaposlenih 7.000 KM, veće izdatke za materijalne troškove 308.376 KM, tekuće grantove za 221.500 KM i kapitalne izdatke veće za 521.143 KM.

Kada su u pitanju tekući izdaci oni se odnose na sledeće povećane stavke:

-Izdaci za energiju za 2.000 KM.

-Za komunalne usluge 55.700 KM, od čega najviše za zimsku službu.

-Za usluge prevoza i goriva 4.000 KM.

-Unajmljivanje prostora za smještaj Civilne zaštite 7.000 KM.

-Za tekuće održavanje 62.582 KM (za održavanje video nadzora 52.400 KM, druga tranša po ugovoru).

-Ugovorene usluge za 182.374 KM (izdaci za PDV 78.512 KM, naknade predsjednicima Vijeća MZ 22.000 KM, izmirenje naknada za članove komisija i slično).

-Tekući transferi pojedincima 68.000 KM (Pomoć boračkim populacijama 60.000 KM namjenska sredstva, troškovi vantjelesne oplodnje za 3.000 KM, obrazovanje za 5.000 KM).

-Tekući transferi neprofitnim organizacijama za 113.500 KM (Obaveze klubova prema savezima i grantovi za 30.000 KM, zbog većih troškova - ulazak klubova u više rangove, Donja Orahoviva, Košarkaški klub, Pribava, te uključivanja ženske košarkaške ekipe, povećanja grantova MZ za 11.500 KM, za Dječije obdanište 15.000 KM - formiranje još jednog odjeljenja, podsticaje u poljoprivredi 15.000 KM, za sufinansiranje nabavke junica, budžet za

mlade nevladine organizacije 10.000 KM, sufinansiranje projekata UNDP-a, te parlamentarne grupe i rad klubova 9.000 KM zbog manje realizacije u prošloj godini, te ostale tekuće rashode u iznosu od 40.000 KM).

Povećani kapitalni izdaci u iznosu od 521.143 KM odnose se na:

- Stambeno zbrinjavanje socijalnih slučajeva za 11.000 KM.
- Utopljanje zgrade Luke za 50.000 KM., namjenska sredstva i sredstva građana,
- Nabavka vozila Komusa, namjenska sredstva.
- Sufinansiranje izgradnje 6 kuća stradalih u klizištima 30.000 KM.
- Grant sredstva za Centar za autizam 10.000 KM.
- Namjenska sredstva za svlačionice na novom igralištu, te naše učešće za pokrivanje zgrade MZ Gračanica i toplifikaciju Doma u G.Orahovici. Projekat UNDP Jačanje uloge MZ-a u BiH.
- Poligon O.Š. „Hasan Kikić“ 5.000 KM.
- Povećanja su još na kupovina zemljišta, izrada projektne dokumentacije.
- Kanalizacija Ališevci namjenska sredstva.
- Fekalna kanalizacija u radnoj zoni (naše učešće).
- Sanacija kanala Bajići i Dom, namjenska sredstva.
- MEG Projekat (naše učešće).
- Fasada zgrade uprave (grant i naša sredstva), put Podlepar Gračanica (zbog realne potrebe da se i u Gračanici radi neki projekat, a da nije iz rente).
- Ambulanta Džakule, naša podrška za završetak započete ambulante.
- Društveni dom Škahovica, namjenska sredstva.
- Sanacija klizišta, namjenska sredstva.
- Put oko terena sa vještačkom travom, zbog zaštite terena i djece, zbog unošenja rizle u teren.
- Putevi u Lukavici, nedostajuća sredstva.
- Putevi u Malešićima, veća sredstva građana i veći izdaci po ugovorima.
- Put Kurtovići Miričina, nedostajuća sredstva planirana iz grantova.
- Putevi u G.Orahovici, za veće učešće građana.
- Putevi u Piskavici prema mezarju (dovršetak započetog puta).
- Putevi u Sokolu, zbog većih troškova po ugovoru.
- Putevi u Stjepan Polju (preraspodjela veći predmjeri).
- Putevi Škahovica (preraspodjela) i dr.

Za sve otalo, koje su stavke još povećane ili smanjene ili nove, možete vidjeti iz materijala i obrazloženja.

Dugo smo radili na Rebalansu. Realno analizirali svaku stavku, pravili procjene, vodili računa o stvarnim potrebama i kada su u pitanju tekući i kapitalni izdaci, te predložili rebalans kakav je u prijedlogu.

Mi se nadamo da će nam se procjene i ostvariti.

Nakon održanih razgovora i sastanaka sa predsjednicima klubova, vijećnicima, te dodatnih procjena, analiza i zahtjeva, kao predlagač rebalansa predlažem slijedeće izmjene i dopune u odnosu na dostavljeni:

-Da se sa ekonomskog koda 821 618 pozicija 18 vodovod G. Doborovci 20.000 KM prebaci na ekonomski kod 821 216 – pozicija 5 Asvaltiranje igrališta u G. Doborovcima.

-Da se na ekonomskom kodu 821.618 – pozicija 10 Vodosnabdijevanje Rašljeva doda 7.000 KM zbog većih potreba za završetak projekta. Sredstva obezbijediti smanjenjem za isti iznos budžetske stavke ekonomski kod 821 619 – pozicija 12 Ostali kapitalni projekti.

-Da se ubaci nova stavka hitna sanacija kanalizacije u G. Orahovici 3.000 KM. Sredstva obezbijediti smanjenjem na ekonomskom kodu 821 211 – pozicija 9 Program stambenog zbrinjavanja korisnika kolektivnih centara.

-Sa iste stavke skinuti 7.000 KM i planirati novu stavku u budžetu postavljanje stolarije na spratu Osnovne škole u Škahovici.

Sve ostale eventualne potrebe za hitnu intervenciju na infrastrukturi realizovati iz budžetske stavke – Budžetska rezerva.

Pratićemo stanje i spram toga reagovati. Prema potrebama dat ćemo dodatna pojašnjenja.

Predlažem Gradskom vijeću da usvoji Rebalans kako bi prišli realizovanju projekata u njegovom izvršavanju.

Znam da neki projekti još nisu realizovani, ali kreću procedure i očekujemo njihovo izvršenje do kraja godine koliko i traje budžetska godina“.

Učesnici u diskusiji:

U ime Komisije za budžet prisutnima se obratio Predsjednik Komisije Osman Sulejmanović:

„Komisija za budžet je održala svoju sjednicu i razmatrala Odluku o izmjenama i dopunama budžeta za 2019. godinu i obzirom da se radi o povećanju budžeta u prihodovnoj strani, a na troškovnoj strani na bazi stvarnih troškova Komisija predlaže Vijeću da se usvoji ova izmjena“.

Edin Šehić, u ime Kluba Stranke za BiH:

„Ja bih se zahvalio Gradonačelniku za zaista iscrpan izvještaj i evo u ime Kluba Stranke za BiH imam ću par nekih pitanja, pa možda i nekih prijedloga vezano za utroške određenih stavki u budžetu. Možda nisam baš kompetentan da predlažem ali evo pokušati ću da navedem na neke stvari koje možda su unapređenje u same transparentnosti a možda i ušteda pojedinih budžetskih stavki. Ono što se da primjetiti jeste da 384.000 KM imamo uvršteno novih projekata i nisu uopšte planirani budžetom pa me iskreno malo para i za oči i za uši. Znae kad se planira budžet on se treba dobro isplanirati i ne treba dozvoliti da baš budu neki projekti vezano da se pojavi u rebalansu ali evo i na samom sastanku smo pojašnjavali da su to namjenska sredstva iz grantova tako da je u ovom slučaju opravdano ali ne bih bilo dobro da se to ponavlja u budućnosti da neki novi projekti ulaze u budžet po rebalansu. Što se tiče povećanja komunalne usluge zimsko održavanje 50 000 KM i mi svake godine imamo taj problem i viđenje naše je da se mora uvesti bolji nadzor samog utroška odnosno same evidencije zimskog održavanja i evo jedan konkretan prijedlog D akle da predsjednici Vijeća MZ nakon što nastupi zimska sezona, odnosno zimsko održavanje puteva do petog u mjesecu za predhodni mjesec dostave preglede održavanja puteva i utroška posipnog materijala. Time ćemo smanjiti, ja ne kažem da se to dešava ali je vrlo moguće da se to dešava određene marvezacije i neka sravnjenja na kraju zimske sezone da neko dopiše kilometre ili ne znam šta drugo. Dakle evo konkretan prijedlog, time ćemo zaista imati i dobru evindnciju a to se može uvesti sada smo u 21. stoljeću da se to pošalje e-mailom ,da služba ima to zaprimljeno i da kasnije nema nikakvih prepravki. Interesuje me također evo konkretno pitanje zašto je brisana stavka od 10.000 KM za BFC certifikaciju Općine. Obrazloženje tamo vidimo da je dosta stvari urađeno u velikom procentu, međutim da li to znači da Grad Gračanica odustaje od BFC certifikacije od posla čaršija i mislim da mi to trebamo nastaviti, prije svega mislim da to zaslužujemo. Pa pojašnjenje zašto je izbrisano i da li će se nastaviti ponovo u narednim godinama toj certifikaciji. Ulaganje u sport također dolazi do određenih povećanja i spram ovih rezultata koje vidimo na terenu i prošle godine velikog uspjeha sportskih kolektiva sa područja Grada Gračanica i iskreno sam sretan i zadovoljan što sam građanin Grada Gračanica i zasigurno postoje opravdani razlozi zašto je došlo do povećanja. Ali samo evo jedan prijedlog da se pokuša samo transparentnije raditi. Vi se sjećate da sam prije par sjednica inicirao da Sportski savez preuzme tu odgovornost da vodi evidencije, da se konkretno bavi svim sportskim dešavanjima na području Grada Gračanica, ali

evo nažalost ta inicijativa nije zaživjela što ne znači da neće. Tako da evo samo jedna inicijativa da se dosta transparentnije prikaže u budžetu, izvršenju budžeta koliko je to koji sportski klub dobio sredstava. Ne tražimo mi da se piše koliko je plaćen sudija, igrači itd., nego samo sportski klub taj koliko sredstava, koliko taj, pa da mi imamo pregled a i sami građani vjerovatno žele da imaju transparentno koji se klub koliko finansira i da je mjerilo učinka koliko ostvaruju rezultate spram ulaganja iz budžeta. Stavka koja je ovako meni privukla pažnju a to je izdaci za vansudsku nagodbu na ime rješavanja imovinsko pravnih odnosa 30.000 KM nova stavka, Gradonačelnik je nije pojasnio pa evo zamolio bih da samo pojasni na što se odnosi s obzirom da je cifra malo veća a i finansira se direktno iz budžeta. I na kraju evo samo da se pojasni s obzirom da je i kolega Džemal Jukan već iznosio vezano za relizaciju korita rijeke Sokoluše, zašto je smanjena stavka od 150.000 KM. Tamo stoji u obrazloženju samo zbog potreba, ne znam zbog kojih potreba pa evo da se pojasni zašto je smanjeno i zbog čega je ovoliki iznos skinut u odnosu na predloženi budžet u samom rebalansu budžeta“.

Vahidin Smajlović, u ime Kluba SDP:

„Klub vijećnika SDP razmatrao je izmjene i dopunu budžeta za 2019. godinu i mi izražavamo zadovoljstvo povećanjem budžeta, što je svakako posljedica prije svega prenešenog viška iz predhodne godine ali i značajnog povećanja prihoda poreznih, neporeznih prihoda što je jako bitno, naročito je ovo bitno povećanje indirektnih poreza za neki 78.000 KM a ako uzmemo učešće indirektnih poreza u strukturi ukupnih proizvoda znamo šta nam to znači jer nam to daje zaista jednu garanciju za izvršenje budžeta za ovu godinu. Došlo je znači do povećanja kapitalnih grantova za nekih 96.000 KM predviđeni su znači, a što se tiče rashodovne strane ovamo po ovim budžetskim stavkama nije bilo nekih većih odstupanja koja su predviđena, izuzev naravno ovih novi kapitalnih proizvoda koji su uvršteni na osnovu povećanja budžeta. Ono što je meni jako bitno i u Klubu smo raspravljali zaista da je evo Gradonačelnik usvojio ovu inicijativu koju sam i ja inicirao zajedno sa Komisijom za poljoprivredu vezano za povećanje postićaja u poljoprivredi za ovih 15.000 KM, odnosi se znači za stimulaciju farmerima, pomoć farmerima koji vrše nabavku steonih junica preko ZZ Gračanka. Svakako da je to jako bitna stavka s obzirom na stanje poljoprivredne proizvodnje, na stanje stočnog fonda i treba da bude jedan vid podrške ovim farmerima koji su odlučili da nastave tu stočarsku proizvodnju. I imamo povećanje po 500 KM za MZ grantova, evo dvije godine zadnje smo povećali za 1.500 KM a za svaku MZ ove grantove koje redovno dobivaju, za funkcionisanje rada Vijeća MZ i to je dobro ali svakako bih trebalo i raditi ćemo vjerujem na tome, svi smo se složili da to treba i dalje da povećavamo da bi zaista MZ pogotovo one koje nemaju dodatnih sredstava mogle normalno da funkcionišu. Imamo ovdje i stavku od 22.000 KM za naknade predsjednicima Vijeća MZ i nisu to nikakve plate bit će o tome Odluka da to bude samo kao neka pomoć za te neke troškove. U suštini na osnovu svega možemo vidjeti da imamo jedno dobro planiranje budžeta i mi se nadamo zaista da će ovakvi prihodi nastaviti se do kraja godine što će rezultirati pozitivno izvršenje budžeta. Mi ćemo kao Klub podržati ovaj rebalans budžeta uz ovaj gore zahtjev a to je Gradonačelnik rekao da se sustignu ovi projekti koji nisu urađeni i da oni projekti koji se ne uspiju ispuniti u ovoj godini da se prenesu u narednu godinu i da budu na listi prioriteta“.

Hasan Puškar u ime kluba stranke SDA:

„Klub Stranke demokratske akcije je razmatrao rebalans budžeta za 2019. godinu i da se ne povaljam sad oko nekih projekata. Uglavnom budžet je živa materija koja se mora prilagođavati i ne može se planirati znači fiksno za čitavu godinu. Najbitniji detalj po meni je i po klubu stranke SDA da su prihodi pratili rashode i da nismo s minusom u budžetu. Za

pohvalu je po nama što je povećan broj projekata u toku godine i mi ćemo kao Klub podržati ovaj rebalans budžeta.“

Gradonačelnik Nusret Helić je odgovorio na pitanja:

„Vijećnik Edin Šehić je pitao vezano zašto je skinuta stavka certifikacija. Zbog toga što nećemo završiti do kraja ove godine i mi ćemo u sljedećoj godini uplatiti, dakle to je zbog toga. Također korito Sokoluše, planirali smo mi da ćemo imati i namjenski sredstava nešto više i računali smo na sredstva fonda i nisu u ovom momentu operativna i zbog toga smo samo ovo što imamo praktično planirano, zašto smo aplicirali, zašto smo dobili Odluke za sredstva i očekujući još od Kantona negdje oko 80.000 KM ovo što je Džemal Jukan spominjao u inicijativi da završimo i prioritet je da završimo ovo oko kružnog toka. Mi bi to davno završili da nismo morali čekati da se razriješi. Što se tiče imovinsko pravnog postupka, mi ne uzimamo zemljište ne prelazi vlasništvo Grada za projekte koji su planirani. Evo imali smo takav slučaj što radimo vodovod gore u Bijelim Poljima i tamo lokacija gdje se radi bazen. Nema gdje drugo nego na tuđem zemljištu i tamo kad smo radili sa vještacima i procijenama nas je izašlo 19 i nešto hiljada KM za izgradnju na toj parceli. U nekim slučajevima prelazi zemljište, to će preći na nas, u nekim zbog prolaska kanalizacionih sistema, vodovodnih kroz dvorišta kao što smo imali slučaj u naselju Čiriš za veliki naš sistem kanalizacije gdje ne daju ljudi. Da bi sad bez dogovora išli dalje mora dobiti opšti interes, pa ima za prolazak ljudi traže i na kraju se sporazumimo za jedan iznos koji zaista bude povelik. Trepanić bivši komandant kroz dvorište između dvije kuće i logično je, čovjek je tražio iznos od 5.000 KM valja privodit što prođe jer tu što prođe nema gradnje i tako to je za te. I ova naša procjena jer imamo dva, tri projekta još gdje zapne kod imovinskih odnosa i valja imati planirana sredstva, ništa drugo nije.“

U međuvremenu pridružio se i vijećnik Mirzet Topčagić.

Prisutno je 30 članova Vijeća.

Sa 26 „ZA“ i 4 „SUZDRŽANA“ prihvaćena je Odluka o izmjenama i dopunama budžeta Grada Gračanica za 2019. godinu.

TAČKA 2

RAZMATRANJE I USVAJANJE IZVJEŠTAJA O IZVRŠENJU BUDŽETA ZA PERIOD 01.01.-30.06.2019.GODINE.

Nusret Helić, Gradonačelnik grada Gračanica:

„Evo prije svega da se zahvalim na usvojenom rebalansu, to je naš zajednički dokumenat i vjerujem da ste se uvjerali kad zajedno radimo da možemo postići zaista dobre rezultate i ovaj budžet ovakav kakav jest, budžet koji nikada nije u deficitu je zaslužno normalno Vijeće i ja se zaista zahvaljujem.

Dobili ste Izvještaj o izvršenju budžeta za prvih šest mjeseci ove godine, sa obrazloženjem iz koga ste mogli vidjeti kakvo je ostvarenje prihoda i rashoda.

Smatram da treba dati dodatno obrazloženje i pojašnjenje, te i ponoviti neka pitanja i konstatacije.

Budžet za 2019. godinu je usvojen u iznosu od 15.746.162 KM, a sastojao se od:

- PRIHODA 14.290.162 KM
- PRIMITAKA 156.000 KM
- VIŠKA PRIHODA IZ PROŠLE GODINE 1.300.000 KM.

U među vremenu smo usmjerili još 132.312 KM namjenskih sredstava, tako da je Budžet povećan za ovaj iznos i iznosi 15.878.474 KM.

Ukupni prihodi i primici ostvareni su u iznosu od 6.193.300 KM ili 84,96 %, što je manje u odnosu na plan, jer nisu ostvareni grantovi, na što nismo mogli uticati.

Nešto veće je ostvarenje na poreznim prihodima 106,78 %, dok su neporezni prihodi ostvareni manje 94 %. U okviru poreznih prihoda veće je ostvarenje kod poreza na dohodak 115 % i poreza na imovinu 135,83 %.

Strukturu ostalih prihoda, te grantova vidjeli ste iz materijala i obrazloženja.

Ukupni izdaci iznose 5.958.879 KM i manji su od planiranih za 24,94 %.

Obzirom da se Izvještaj odnosi na šest mjeseci logično je bilo da dođe do prekoračenja na nekim stavkama zbog prirode tih troškova, ali ne postoji prekoračenje po budžetskim stavkama kada se posmatra plan za 12 mjeseci.

Iz sintetike rashoda i izdataka je vidljivo izvršenje po namjenama:

- Plaće, naknade i troškovi zaposlenih 95,18 %.
- Doprinosi na plaće 97,47 %.
- Izdaci za materijalne troškove u koje ulaze putni troškovi, izdaci za energiju, komunalne usluge, nabavku materijala, usluge prevoza i goriva, tekuće održavanje i ugovorene usluge 88,86 %.
- Tekući grantovi 99,51 %.
- Izdaci za kamate i ostale naknade 54,20 %.
- Tekuća budžetska rezerva 63,72 %.
- Kapitalni izdaci 46,78 %.
- Otplata duga 117,54 %.

Spomenuo sam neka prekoračenja u odnosu na period od 6 mjeseci, pa da ih spomenem:

- Održavanje puteva u gradu 159,71 %.
- Održavanje video nadzora 124,74 %.
- Antivirusni program i licence 200 %.
- Volonteri 132 %.
- Komisije iz ranijeg perioda 200 %.
- Projekat harmonizacije 118 %.
- Sajmovi 195 %.
- Stipendije učenika i studenata 161,24 %.
- Transfer za obrazovanje 194,72 %.
- Obaveze klubova prema savezima 134 %.
- Predškolsko obrazovanje 158 %.

I na još nekim, kao što su kapitalni izdaci. Već sam pomenuo da nema prekoračenja u odnosu na plan za 12 mjeseci.

Šest mjeseci je prošlo i izvršenje je sasvim drugačije, posebno na kapitalnim projektima jer je veći broj realizovan, izuzev onih koji su vezani za grantove koji još nisu stigli.

Za neke projekte koji su bili odobreni od Vlade namjenska sredstva za Općinu je bilo odobreno iz vodovodnih naknada negdje oko 500 hiljada obustavljeni su svi iako smo mi ušli u proceduru, obustavljeno je izvršenje te Odluke ali mi po procjenama očekujemo da nećemo dobiti manje sredstava tako da nisam htio ni spominjati jer računamo da će to biti ispunjeno do kraja.

Predlažem da Vijeće usvoji Izvještaj o izvršenju budžeta za 2019.godinu“.

Učesnici u diskusiji:

Osman Sulejmanović, u ime Komisije za budžet :

„Komisija je razmatrala Izvještaj o izvršenju budžeta za prvih šest mjeseci i predlaže Vijeću da isti usvoji uz sugestiju Gradonačelniku, odnosno nama svima ovdje da preispitamo

ulaganja oko klizališta u gradu. Tamo je negdje oko 70.000 KM pa da se vidi da li je to rentabilno odnosno opravdano“.

Edin Šehić:

„Ja ću samo imati dvije konstatacije vezano za izvršenje budžeta. Kao što je Gradonačelnik rekao 46,78 % kapitalni izdaci ali u samoj analitici se vidi da je to samo par projekata i neki su čak 200 % odnosno u potpunosti izvršeni. Obzirom da je prvih šest mjeseci da se pokuša u narednom periodu projekti koji se prenose da se ubrzaju procedure da se oni ipak u prvoj polovini godine implementiraju, obzirom da onda kažemo da ne može izvođač stići da završi da ne ulazimo u zadnje polugodište jer zaista je nemoguće izvršiti budžet, a mi znamo kako sa izvođačima i kojim izvođačima na području Grada Gračanica barem što se tiče ove putne infrastrukture. I samo još jedno pitanje na strani 9. Izdaci za grantove sportskim klubovima vršene su u iznosu od 252.120 KM u skladu sa Odlukom o raspodijeli sredstava. Pa evo ja bih zamolio ili Gradonačelnika ili odgovornu službu da mi dostavi tu Odluku o raspodijeli sredstava za sportske klubove, čisto da vidim o kakvoj se Odluci radi“.

Vahidin Smajlović, u ime Kluba SDP:

„Klub SDP će podržati ovaj Izvještaj o izvršenju budžeta za prvih šest mjeseci ove godine. Evidentno je da imamo dobre ostvarene rezultate i da imamo ostvaren suficit koji je prije svega po osnovu ovih prenesenih sredstava iz predhodne godine ali jako je bitno da nema prekoračenja u pojedinim budžetskim stavkama. Da smo prihode od indirektnih poreza dobro uskladili ovako kako smo planirali imamo punjenje budžeta po tim prihodima i vidimo da smo dobro isplanirali budžet. Ono što bi ja uputio Gradonačelniku pitanje vezano za ove kapitalne projekte grantove iz Kantona i viših nivoa vlasti, s obzirom da imamo evo formiranu ovu novu Vladu, nova vlast pogotovo na TK gdje evo za ovih prvih šest mjeseci barem ovdje u Izvještaju stoji da iz Kantona procenat ostvarenih grantova samo 8,7 %. Kakve su naše pretpostavke po pitanju. Znači očekujemo da će doći do ostvarenja i to je jako bitno jer tu su nam zaista ogromna sredstva i zato ja kažem da treba dodatno izvršiti pritisak na sve nivoe vlasti od Kantona do Federacije da bi mogli da dođemo do ostvarenja tih grantova“.

Izvještaj o izvršenju budžeta za period 01.01.-30.06.2019.godinu je usvojen jednoglasno.

TAČKA 3

RAZMATRANJE I USVAJANJE IZVJEŠTAJA O UTROŠKU BUDŽETSKE (TEKUĆE) REZERVE ZA PERIOD 01.01.-30.06.2019.GODINE.

Učesnici u diskusiji:

Edin Šehić:

„Evo u obrazloženju kod rebalansa budžeta Gradonačelnik je dotakao malo temu vezano za obdanište „Naša djeca“ ali sa obzirom da je povećana stavka od 15.000 KM već u rebalansu, a u rezervi imamo 6 000 KM za pomoć obdaništu na ime otplate zaostalih obaveza i 5.000 KM sufinansiranju projekta obnove prostorija J.U. Dječije obdanište „Naša djeca“. Samo da pitam šta je u pitanju ovih 15.000 KM, da li je ovo što je napominjao za novog uposlenika ili vjerovatno se nije potkrala greška da je to duplo ali samo da se pojasni zašto 15+5+6.“

Nusret Helić, Gradonačelnik dao je odgovor:

„Ovih 15.000 KM je namjenski što smo sada usvojili za ovo novo odjeljenje. Ovih 6.000 KM koliko se sjećate možda i na Vijeću kad su bili Izvještaji o radu dječijeg obdaništa iz ranijeg perioda osto je jedan dug prema Poreskoj upravi, ne prema dobavljačima i to je naraslo i došlo izvršenje nam negdje oko 18.000 KM. I onda smo zajedno pošto je to naša ustanova išli u Poresku upravu pokušali da to naprave da plaćamo na jedan duži period i u sklopu tog dogovora bilo je da mi mjesečno u tri mjeseca isplatimo po 2 000 KM obdaništu da bi izašli iz te situacije. Ovih 5.000 KM je opet jedan projekat na koji su se oni prijavili za obnovu i traženo je učešće obdaništa. Obdanište nema kapaciteta finansijski da može i to je dakle učešće naše po ugovoru za obnovu obdaništa na Lukama. I izašli su, sanirali su te ranije dugove i da se sad ne vraćamo čega je to rezultat.“

Izvještaj o utrošku budžetske (tekuće) rezerve za period 01.01.-30.06.2019.godine je usvojen jednoglasno.

TAČKA 4

RAZMATRANJE I USVAJANJE LOKALNOG AKCIONOG PLANA ZA RE/INTEGRACIJU BH DRŽAVLJANA KOJI SE VRAĆAJU PO OSNOVU SPORAZUMA O READMISIJI NA PODRUČJE GRADA GRAČANICA ZA PERIOD 2019-2022.GODINA.

Učesnici u diskusiji:

Vahidin Smajlović, u ime Kluba SDP:

„Klub SDP će svakako podržati ovaj plan pomoći ovim licima koji se vraćaju iz drugih zemalja po bilo kojim osnovama i dajemo punu podršku lokalnom administrativnom timu da bude na usluzi svim tim građanima da pomognemo.Uglavom iz ovog Izvještaja se i vidi da su to najvećem dijelu od ovih 9 koji su vraćeni 5 je socijalne prirode ali evo veoma je bitno da su oni svi zbrinuti i zaista bez obizira moramo voditi računa o tome i dajemo punu podršku da svim tim osobama pomognemo i da im budemo na usluzi. Evo već u 2020.godini u budžetu ćemo planirati sredstva za te potrebe. Ono što bih ja ovdje postavio jedno pitanje, da li je to greška ili jeste tako stvarno, pitanje vezano za ovaj plan a odnosi se na opći podaci o lokalnoj zajednici vezano za Centar za socijalni rad. Tamo u ovom Izvještaju u akcionom planu stoji da broj korisnika Centra za socijalni rad po raznim osnovama je 11.043 korisnika, što je kako sam ja izračunao 24,4 % od ukupnog broja stanovništva s obzirom da u Gračanici živi oko 45.220 stanovnika. Ili može biti dobro formulisana rečenica ili zaista imamo toliko korisnika što se tiče 11.043 po bilo kojim osnovama“.

Edin Šehić:

„Evo Klub Stranke za BiH također će dati podršku ovom lokalnom akcionom planu i naravno timu koji radi na svemu ovome što smo dobili u dokumentaciji.Obzirom da se ovdje pominje povratak naših ljudi iz dijaspore i stranih zemalja .Jedan vid kao inicijative da pokuša Gradonačelnik sa svojim službama, da li da se napravi posebna služba il već ne znam sad u kojoj formi.Dijaspora,vi znate kako dolazi u ljetnim danima i kako su naši hvala bogu ljudi dosta uspješni u dijaspori.Da se promovišu privredni potencijali i eventualno potencijali gdje bih mogli investirati,da bi kao neka baza ili info tačka ali da se dobro ispromoviše da svi ljudi iz dijaspore koji su imućni i mogu da ulažu u naš Grad na područje Grada Gračanica da se imaju kome obratiti.Ja znam da se imaju oni kome obratiti kada dođu u Općinu, ali moraju taksativno imati dobru reklamu da im se otvori mogućnost da mogu ulagati u našu sredinu i da na neki način da se oformi služba za vezu sa dijasporom pa možda ovaj tim,ova grupa da može raditi na pripremi podataka u bazi podataka koji su ljudi zaista sposobni odnosno imaju sredstava i da žele da ulažu u naše područje Grada Gračanica“.

Pomoćnik Gradonačelnika Alma Buljubašić dala je odgovor:

„U ovom materijalu je navedeno da je broj korisnika Centar za socijalni rad po raznim osnovama, dakle ne radi se o pojedinačnim korisnicima Centra za socijalni rad, nego neko ostvaruje ta primanja iz Centra za socijalni rad po jednom, po dva, po tri osnova. A evo da još malo vam pojasnim vezano za ove osobe koje su vraćene dakle iz dijaspore po raznim osnovama. Mi smo u tri slučaja imali situacije da smo im pomogli na način odnosno donatori Katolički centar i Grad Gračanica i korisnici su dobili određenu pomoć. Znači jedna porodica je dobila pomoć u obliku donacije ovaca, jedna porodica tj. jedna samohrana majka je dobila pomoć na način da joj je plaćeno školovanje za frizera i još jedna porodica je dobila kontejner za prikupljanje sekundarnog otpada. Znači nisu nasumično davane pomoći, nego je naš tim za reamisiju za članovima iz katoličkog centra su obilazila na terenu sva ova lica koja su evidentirana i spram njihovih potreba odnosno izraženih želja su im donirali određena sredstva“.

Lokalni akcioni plan za re/integraciju BH državljana jednoglasno je usvojen.

TAČKA 5

RAZMATRANJE I USVAJANJE PRIJEDLOGA ODLUKE O OSNIVANJU GRADSKOG ŠTABA CIVILNE ZAŠTITE.

Nusret Helić, Gradonačelnik Grada Gračanica:

„Jutros na Komisiji razmatrajući ovu Odluku predloženo je da se u članu 7. kad se govori o odgovornosti Štaba civilne zaštite da ne odgovara samo Gradonačelniku, nego da odgovara i Gradskom vijeću s obzirom da Gradsko vijeće donosi Odluku o formiranju štaba. Ja kao predlagач sam to prihvatio i evo predlažem da i Gradsko vijeće prihvati. Dakle, odgovara Gradonačelniku i Gradskom vijeću“.

Nije bilo učesnika u raspravi.

Odluka o osnivanju Gradskog štaba Civilne zaštite je usvojena jednoglasno sa izmjenama koje je prihvatio Gradonačelnik.

TAČKA 6

RAZMATRANJE I USVAJANJE PRIJEDLOGA ODLUKE O VISINI NAKNADE PREDSDJEDNICIMA VIJEĆA MJESNIH ZAJEDNICA.

Učesnici u diskusiji.

Anes Avdić:

„Imam amandman, član 2, da se doda, a u koliko predsjednik MZ član i Gradskog vijeća nema pravo na naknadu“.

Vahidin Smajlović:

„Zaista bih trebali ovdje da budemo malo ozbiljniji. Da malo radimo na jedan zakonski način onako kako treba. Ne kažem da ovo nije prijedlog za razmatranje, ali zaista evo mi kad god smo razgovarali o stanju MZ, o problemima o svemu, insistirali smo i ja i kolega Džebo. Hajmo da svi vijećnici ovdje u Gradskom vijeću, da svi budemo uključeni u rad Vijeća MZ, znači prvo bi trebali o tome da malo razgovaramo. Da svi oni koji su ovdje gradski vijećnici, hajmo drugovi da budemo i članovi Vijeća MZ, pa da tamo radimo da vidite da tamo ima posla, zaista ima. Ne kažem ja da se i o tome može raspravljati ali zaista daj da to

provedemo na jedan zakonski način i na vrijeme da prenesemo, imali smo javne rasprave. Imamo ovdje po pitanju ovog ovdje evo od svih MZ došli su pregledi samo od četiri MZ, znači iz četiri MZ a pričamo da imamo u MZ da ne funkcioniše, da je teško, da ćemo doći u situaciju da neće htjeti niko da radi, ni mi evo nećemo da radimo. A znaju oni koji su bili u vijećima i koji su predsjednici Vijeća MZ da tu zaista ima puno posla i teškog i odgovornog i zaista se mora raditi ali evo to je prijedlog. Što se tiče ja sam tokom rasprava o radu svih MZ bio za to da se na jedan način ne da plata tim predsjedavajućima, nego da se da jedan vid naknade za pokrivanje tih nekih sitnih troškova, telefona, goriva. Pogotovo za one MZ koje nemaju nikakvih drugih prihoda izuzev ovog granta koji dobivaju iz budžeta MZ. Ipak moramo razgraničiti velike MZ i opet kažem hvala bogu imaju dakle jake razvijene MZ i one mogu na neki način, dok druge MZ jednostavno ne mogu. Znači ovo nisu nikakve plate, ovo nije nikakvo pokrivanje, ovo je jednostavno naknada iz budžeta Grada Gračanica tim ljudima koji rade. Da bude stimulans svim ljudima koji žele da se uključe u rad Vijeća MZ i da sutra barem neće trošiti koliko toliko svoja sredstva nego da će biti na neki način obeštećen. Imamo ovdje u članu 3. ove Odluke također navedeno da mogu da se VMZ u skladu sa svojim mogućnostima mogu da predvide i finansijska sredstva i neki vid naknade za sve ostale članove Vijeća naravno koliko ko može. Što se tiče Kluba SDP mi ćemo podržati ovaj prijedlog Odluke, a naravno znači za sljedeći budžet možemo raspravljati da li treba isti iznos svim MZ ili da na neki način napravimo neke skale.“

Edin Šehić, u ime Kluba Stranke za BiH:

„Evo Klub Stranke za BiH će podržati ovaj prijedlog. Znamo koliko VMZ treba da dobije još i odgovornosti i nadležnosti ali evo i ovo je dobar pomak sa 10 % na 20 %. Ja bih zamolio predlagачa da nam samo pojasni malo vezano za ovu isplatu naknade 20 % vi znate da su tu obaveze i obračuni malih doprinosa to je još 18,29 % na isplatu naknade i znači nije stavljeno da pripada neto naknada jer ovo onda ide preko 20 %. I malo mi u koliziji član 2, član 3, jer član 3 kaže MZ će svojim statutom regulisati pitanje naknade predsjednika. Dakle neću kolegu prozivati naljutit će se, ali neka MZ spram svojih prihoda može reći da će to biti 500 KM, šta ćemo sad s tim. Ako u članu 4. stoji da Odlukom po isplati naknade donosi Gradonačelnik. Dakle Gradonačelnik samo može donijeti Odluku spram budžeta, odnosno budžetskih sredstava. Tako da gospodo predsjednici Vijeća MZ koji ste do sada imali naknade i koji ste imali veće naknade više ih nećete imati, jer ovom Odlukom vi možete samo imati 20 %. Tako da se samo razjasni i evo ovo vezano 20 %, da li je to više od 20 % jer imamo te male doprinose“.

Almedin Devedžić, u ime Kluba SDA:

„Evo Klub SDA razmatrao je ovu Odluku i drago mi je zbog naših ranijih inicijativa i da je možda ovo jedan povod da se donesu određeni zaključci za ubuduće da se rad Vijeća MZ prije svega kada je u pitanju organizovanost „uozbilji“ oni koji rade, rade, oni koji ne rade, ne rade i da je potrebno prema svim MZ uputiti određene zahtjeve povodom toga ali i prava i njihove obaveze. Sigurno da je SDA kao parlamentarna u ovom Vijeću tražila da se ljudima koji su na terenu, odnosno članova VMZ posebno predsjednicima VMZ sigurno treba pomoći. Postoji ovdje mnogo i vijećnika koji su trenutno predsjednici VMZ, koji su možda i ranije bili, a ima dosta i onih koji nikada nisu zakoračili u MZ niti su osjetili šta to znači raditi u VMZ, šta to znači saradivati s ljudima koji su svaki dan za vratom. Ja mogu to da kažem zato što sam bio predsjednik VMZ. I ovom prilikom želim da uputim podršku i VMZ Lukavica odakle dolazim kojim isto tako treba da pomognu kao i ostalim. Znači ima dosta onih koji izađu za ovu govornicu i kažu treba ovo, treba ono a ustvari nemaju pojma šta se dešava tamo na terenu, koji su to problemi lokalnih zajednica, kako ljudima pomoći a dolazi svakavih ljudi i traže svašta a ti si ograničen sa sredstvima i ne možeš im pomoći. Dakle ima dosta takvih i ja bih htio da takvi ako može ikako da se suzdrže od nekakvih aktivnosti VMZ jer pričaju odavde iz ove udobne fotelje a ne znaju šta se dešava u njihovim lokalnim

zajednicama. Dakle ove naknade mi smo na kolegiju razgovarali da treba pomoći predsjednicima VMZ, treba im pomoći prije svega da ih stimuliramo jer su to čisti volonteri, da se stimuliraju prije svega novčano da barem ljudi svoje pare ne troše, telefon ili gorivo kada dolazi na sastanke. U narednom budžetu treba raditi ako ima prostora da se tim ljudima još više izademo materijalno u susret. A što se tiče ovih naknada mislim da kolega Šehić, ne znam kako je on to shvatio, ma da će i sekretarka da izađe i da pojasni, znači svako Vijeće u MZ ima potpuno pravo da nagradi svoje članove spram svojih mogućnosti. Prema tome to je sad individualno kako stoji finansijski VMZ. Dakle SDA podržava ovu Odluku i nadamo se da će u narednom budžetu, ti ljudi koji stvarno rade na terenu i koji pokušavaju da riješe velike probleme lokalnih zajednica biti još više nagrađeni kako oni tako i ostali članovi tog Vijeća“.

Edin Šehić:

„Želim da repliciram kolegi Almedinu.

On kaže da svaka MZ koliko imamo finansijske mogućnosti da možemo nagraditi svoje članove i samog predsjednika VMZ, slažem se, ali zašto mi onda ovdje uvrštavamo bilo kakvu budžetsku stavku da dajemo predsjednicima MZ ravnopravno, dakle dajemo ravnomjerno svim predsjednicima istu naknadu, neki su to do sad imali a neki kao što ja dolazim iz MZ Babići nikad, apsolutno nikad naknada nije bila, niti članovima VMZ, niti predsjedniku VMZ. Ne možemo staviti u istu ravan tog predsjednika i predsjednika neke MZ gdje imaju naknade ne znam sad kolike jer nemam pred sobom nikakav izvještaj ali sigurno u nivou prosječne plate. Zato bih vas zamolio, odnosno evo nadam se da će sekretar pojasniti malo vezano za ovaj član 2 i član 3. Član 3 može samo da stoji MZ će svojim statutom regulisati pitanje naknade članovima VMZ, predsjednik je završen, on ima naknadu propisanu ovom Odlukom koja se obezbjeđuje u budžetu i zato su planirana sredstva i on ne može više imati nikakvu naknadu. Dali će te vi dati članovima VMZ 500 KM, bujrum dajte, ali vi ne možete veći iznos od onoga koji smo mi donijeli ovom Odlukom“.

Hasan Puškar:

„Pa ništa evo pošto sam se konsultovao malo sa kolegom, ja mislim da je se član 3. odnosio, da VMZ ukoliko ima mogućnosti će izvršiti naknadu članovima VMZ, zar se ne bi član trebao odnositi na predsjednika. Članovima Vijeća, ja mislim da je ovdje riječ predsjednik suvišna u članu 3. Ali inače ja mislim da bi trebao što se tiče Općine znači isplate iz budžeta. Svi predsjednici da budu isto i ravnomjerno plaćeni, nije bitno jel on iz Sokola, Malešića, Buka, Rašljeve, nebitno. A ako je veća MZ ona znači ima veće prihode i ona će donamiriti rad svog predsjednika kako što vjerovatno imamo sad neke koji su isplaćeni. Znači ja samo mislim da je u članu 3. riječ predsjednik suvišan“.

Dženana Tukulj, Sekretar Gradskog vijeća:

„Pa mislim da je rješenje po meni u članu 1. Ovom Odlukom utvrđuje se visina naknade predsjednicima Vijeća MZ koja se isplaćuje iz budžeta. I ovom Odlukom je regulisano samo ono što se odnosi na budžet Grada Gračanica. Što se tiče neto plate ili naknade ni u Odluci o visini naknade vijećnika nije stavljena neto naknada a isplaćuje se neto. Znači mi smo predvidjeli u budžetu 22.000 KM, uračunato 20.000 KM plus 20 % plus porez i doprinosi koji se plaćaju na to. I mislim da ovdje nema dileme koliki je to iznos, tako isto isplaćujemo i vijećničke naknade. Član 4. koji ste spomenuli, Odluku o isplati naknade iz člana 2., znači samo ono što se isplaćuje iz budžeta. Dali će te Odluku vi sad ovo što je Hasan rekao predsjedniku, dali može ili ne može to sazovite kolegiji kao predlagač pa da dogovorite jel predsjednik dobiva naknadu za rad samo iz budžeta Grada ili eventualno može i iz Vijeća svojih MZ kao član Vijeća MZ ja to ne bih odlučivala. Mislim da je ovdje ovako jasno postavljeno, ne odlučuje Gradonačelnik o isplatama svim, nego samo onim koji se odnose na

budžet Grada kao što je za sve ostale naknade i ova Odluka se odnosi samo na visinu naknade koja se isplaćuje direktno iz budžeta“.

Hasan Puškar:

„Pa po ovome sad ispade da je član 3. ovdje suvišan čitav. Ako se isplaćuje s budžeta onda ne treba MZ nikako stavljati u taj član. Znači ili ga izbaciti potpuno, ali ja pošto sam učestvovao u kreiranju ove Odluke, ja kažem da je taj član 3. omogućavao VMZ da zakonski ako imaju sredstava mogu plaćati članovima Vijeća. Član Vijeća se i podrazumijeva i predsjednik i zato kažem ili da ostane ovako da član 3. glasi: MZ će svojim statutom regulisati pitanje naknade članovima Vijeća MZ u skladu sa finansijskim mogućnostima MZ. A svi su članovi ili da izbacimo taj član. Komplikujemo, hajmo vratiti Odluku pa ponovo, nemojte da komplikujemo. Ja sam učestvovao u kreiranju ovoga i ja kažem ovako, po meni je član 3. il da ga izbacimo skroz il da ostavimo članovima Vijeća a svi su članovi Vijeća i to je to nemamo šta komplikovati. Druga stvar, Edine jel i u jednoj odluci piše Općinskog vijeća neto iznos, nego piše prosječno 5 %, 10 %, 40 % ili bilo čega, znači podrazumijeva se da su obaveze plus. Ne moraš ti podrazumijevati evo nas 29 podrazumijeva i ne moramo uvijek nešto komplikovati bezveze. Evo i sljedeća Odluka ne piše neto i ne piše u Odluci o paušalima, neto, bruto, ovako ,onako“.

Data je puaza u trajanju od pet minuta, kako bi Kolegij održao sastanak.

Replika:

Senahid Džebo:

„Jesam odustao sam od rasprave, međutim moram repliku kazati jer obzirom da se ovdje aludira na MZ koje posluju dobro i hvala bogu rade svoj posao. Jedna od rečenica koja je ovdje kazana za ovom govornicom je to da su isplaćivane nekakve naknade predsjednicima Vijeća MZ u tim MZ ne navodeći znači koje su MZ čak u prosjeku nekakve plate u Federaciji kako sam ja razumio. Mislim da je to omaložavanje tih ljudi koji su radili svoj posao volonterski. Ja lično sad ću ovdje iznijeti i ne stidim se nikoga, naknada u Vijeću MZ Stjepan Polje je pet godina bila 160 KM ne naknada za rad predsjednicima MZ nego za troškove predsjednika. Mene lično što se tiče, predsjednicima svih MZ po šest osnova bih uveo naknadu jer to su ljudi koji rade na terenu za razliku od pojedinaca koji sjede ovdje, dođu jednom na sjednicu podignu ruku i izađu odavde i odoše lagodno a uzmu naknadu da li je to 50 % prosječne plate il nije ne znam, to znaju službe. Tako da sam osjećao potrebu da moram replicirati ove stvari, niti je to šta skriveno. U svim dosadašnjim godinama i Izvještajima dostavljano je i Općini i finansijskoj službi i svima, da su to bile naknade troškova u visini 160 KM u MZ Stjepan Polje. Koliko sam upoznat evo i u susjednoj MZ nije ništa više možda 10 ili 20 KM. To su ljudi koji su do sada radili volonterski bez naknade za rad samo da im se pokriju oni njihovi troškovi. A lično evo i ovu Odluku ja bih uveo retroaktivnu za 2019. godinu pa ko je predsjednik, predsjednik je“.

Odluka je data na glasanje. „ZA“ je glasalo 24 vijećnika, suzdržana 2 vijećnika.

Primjedbu je uputio vijećnik Džebo Senahid da se kod glasanja navede rezultat poimeničnog glasanja.

Hasan Puškar je u ime Kluba SDA izrazio sumnju i zatražio poimenično glasanje.

Prešlo se na poimenično izjašnjavanje Vijećnika:

Krajinović Nihad „ZA“, Sulejmanović Osman „ZA“, Topčagić Mirzet „ZA“, Hasić Ibrahim „ZA“, Smajlović Vahidin „ZA“, Bajrić Vahid „ZA“, Hadžić Mirsad „ZA“, Milkić

Demir – odsutan (nije bio u sali), Šakušić Ahmet „ZA“, Muslimović Adnan „ZA“, Puškar Hasan „ZA“, Devedžić Almedin – odsutan (nije bio u sali), Mujkić Mirsad „ZA“, Ahmetović Halid „ZA“, Alihodžić Nermina „ZA“, Dizdarević Kemal „ZA“, Džebo Senahid „ZA“, Hadžić Nejra „ZA“, Jukan Džemal „ZA“, Dedić Dino – odsutan (nije bio u sali), Šehić Edin „SUZDRŽAN“, Saša Operhal „ZA“, Omerović Muhamed „ZA“, Džananović Mirza „ZA“, Ibrišević Edin „ZA“, Ibrišević Alen „ZA“, Mešić Fadil „ZA“, Aljić Adem „ZA“, Avdić Arnes „SUZDRŽAN“, Mujić Alen „ZA“.

Usvojena je Odluka o visini naknade predsjednicima Vijeća mjesnih zajednica sa 24 glasa „ZA“ i 2 „SUZDRŽANA“.

TAČKA 7

RAZMATRANJE I USVAJANJE PRIJEDLOGA ODLUKE O VISINI PLAĆE I NAKNADA IMENOVANIM DUŽNOSNICIMA U REGULARNIM TIJELIMA GRADA GRAČANICA.

Nije bilo učesnika u diskusiji i Odluka o visini plaće i naknada imenovanim dužnosnicima u reguliranim tijelima Grada Gračanica je jednoglasno usvojena.

TAČKA 8

RAZMATRANJE I USVAJANJE ODLUKE O PRODAJI NEKRETNINA.

Nije bilo učesnika u diskusiji i Odluka o prodaji nekretnina je jednoglasno usvojena.

TAČKA 9

RAZMATRANJE I USVAJANJE PRIJEDLOGA ODLUKE O PROMJENI STATUSA JAVNOG PUTA.

Nije bilo učesnika u diskusiji i Odluka o promjeni statusa javnog puta je jednoglasno usvojena.

TAČKA 10

ODLUKA O PRESTANKU I DODJELI MANDATA ČLANOVIMA VIJEĆA MZ DONJA ORAHOVICA.

Nije bilo učesnika u diskusiji i Odluka o prestanku i dodjeli mandata članovima Vijeća MZ Donja Orahovica je jednoglasno usvojena.

TAČKA 11

DONOŠENJE RJEŠENJA O RAZRJEŠENJU ČLANA KOMISIJE ZA PROPISANJE I STATUT, IZBOR I IMENOVANJE, GRADSKA PRIZNANJA I OBILJEŽAVANJE ZNAČAJNIH DOGAĐAJA I LIČNOSTI.

Učesnici u diskusiji:

Senahid Džebo:

„Upravo sam ponio ovu sad što smo glasali prethodnu Odluku koja je uredno potpisana od Predsjednika Općinskog odbora SDP BiH Gračanica Nusret Helić. Znači kada je se obratio i tražio zahtjev na osnovu čega je pokrenuta ova Odluka. Međutim ja iz ovoga ne vidim ovdje po ovom zahtjevu, pričam o ovoj tački o razrješenju člana. Kad se podnese dole kaže glavni odbor SDU Gračanica i onda nešto dole potpisano, meni stvarno nije jasno ovdje.

Prvo mi nije jasno da li postoji uopšte ovaj glavni odbor SDU i da li postoji stranka SDU na Općini Gračanica i koje taj što nije potpisao ime i prezime pa da znamo ko to upućuje, ko traži, ko nam zahtjev ovdje podnosi, evo shodno prethodnoj ovoj Odluci koju smo sad imali. Zato pitam jer meni jednostavno nije jasno“.

Pauza je data u trajanju od pet minuta, kako bi Kolegij održao sastanak.

Hasan Puškar, u ime Kolegija:

„U ime Kolegija i u ime Komisije. Prvo da kažem jedno, evo drugi put dolazim na Vijeće i evo sad je Kolegiji napravio kompromis. Znači SDU je politička opcija koja trenutno ne egzistira u Vijeću i ja ne znam imali je na Općini uopšte. Znači u buduću stranka koja nije parlamentarna ona nema šta prijedloge slati. Ali evo danas Kolegij predlaže radi rada Komisije za propise i Statut da prihvatimo ovaj prijedlog o imenovanju novog člana Komisije za propise i Statut, u ime Kolegija Gradskog vijeća Gračanica“.

Nihad Krajinović, Predsjedavajući Gradskog vijeća:

„Ako se slažete da glasamo o razrješenju i imenovanju ujedno, obzirom da je riječ o istom“.

Dakle, zaključujem raspravu i dajem na izjašnjavanje o Rješenju o razrješenju člana Komisije za propise i Statut, izbor i imenovanja, gradska priznanja i obilježavanje značajnih događaja i ličnosti i Rješenje o imenovanju novog člana Komisije za propise i Statut, izbor i imenovanja, gradska priznanja i obilježavanje značajnih dokagaja i ličnosti, na prijedlog Kolegija.

Jednoglasno su prihvaćena rješenja.

TAČKA 13

RAZMATRANJE I USVAJANJE IZVJEŠTAJA O PROCIJENJENOJ ŠTETI OD PRIRODNE NESREĆE UZROKOVANE POPLAVAMA VODOTOKA I I II KATEGORIJE NA PODRUČJU DIJELA GRADA GRAČANICA U PERIODU OD 01. 06. 2019. - 27. 06. 2019. GODINE.

Nije bilo učesnika u diskusiji i Izvještaj o procijenjenoj šteti od prirodne nesreće uzrokovane poplavama vodotoka I i II kategorije na području dijela Grada Gračanica u periodu od 01.06. 2019. – 27. 06. 2019.godine je usvojena jednoglasno.

TAČKA 14

RAZMATRANJE I USVAJANJE IZVJEŠTAJA O OSTVARENJU GODIŠNJEG PLANA IMPLEMENTACIJE STRATEGIJE RAZVOJA OPĆINE GRAČANICA ZA 2018. GODINU,

Nije bilo učesnika u diskusiji i Izvještaj o ostvarenju godišnjeg plana implementacije strategije razvoja Općine Gračanica za 2018.godinu je usvojen jednoglasno.

TAČKA 15

RAZMATRANJE INFORMACIJE O AKTUELNIM PRIVREDNIM KRETANJIMA NA OPĆINI GRAČANICA U 2018. GODINI.

Učesnici u diskusiji:

Vahidin Smajlović:

„Evo prije svega bih da pohvalim ovu Informaciju i službu koja je radila jer ovo je jedna zaista dobra i sveobuhvatna Informacija iz koje zaista možemo sve dobro pratiti privredna kretanja na području Grada Gračanica. A ona su takva da je evo danas Gračanica po rangu razvijenosti na 26. mjestu od 79 općina i gradova u Federaciji Bosne i Hercegovine. Imamo mi u 2018. godini i pored svih problema i nedostataka koje imamo, imamo i jedan pozitivan trend privrednih kretanja na području Grada Gračanica, imamo porast ukupnog prihoda za 7,9 %, zaposlenost veća za oko 3%, izvoz je porastao za 10,3 % a ukupna dobit nažalost pala je za nekih 2 %, što znači da se moramo prilagođavati uslovima na tržištu. Gdje je dobit bila recimo u 2018. godini 18,8 % znači vidimo da je i ovo jedan pokazatelj težeg stanja u privredi generalno u BiH što ne mimoilazi ni Gračanicu. Dobar je podatak da je blagi porast plaća oko 5 % na području Grada Gračanica, međutim još uvijek nedovoljno, još uvijek smo mi nažalost i to nam nije dobar pokazatelj, još uvijek smo skoro na zadnjem mjestu što se tiče prosječnih plata. Ali evo vjerujem da će i posljedica ovog velikog odlaska stanovništva da će dovesti do toga da plaće u privrednim subjektima i plate radnika na području Grada Gračanica neminovno rasti. Zapaža se povećanje poslovne aktivnosti na stranom tržištu, znači spoljnotrgovinska razmjena je povećana za oko 5 %, a ono što je zaista isto bitan podatak je da imamo pokrivenost izvoza uvozom znači da mi imamo prvi put u ovoj godini veći izvoz nego što imamo uvoz i to je svakako dobar pokazatelj i za pohvalu privrede Gračanice. Šta možemo očekivati u narednom periodu pored svih ovih dobrih pokazatelja imamo nažalost taj trend koji je zadesio cijelu BiH a to je odlazak radno sposobnog stanovništva. Nažalost evo svakodnevno slušamo oglase na radiju Gračanica, nedostaje radnika, nedostaje majstora, nedostaje zidara, tesara, jednostavno nedostaje kvalifikovane radne snage i to je svakako veliki problem za gračaničku privredu. Posljedica toga je, ja vjerujem dobrim dijelom da su smanjene investicije u ovoj godini, znači dosta dobro u odnosu na prethodne godine ulaganja u ove proizvodne pogone. Da li su one firme već popunile svoje proizvodne kapacitete pa nemamo baš novih, ali svakako svi mi koji radimo i komuniciramo sa ljudima svaki danas privrednik ima problem radne snage. Prave se hale, radimo, imamo mašine ali neko za tim mašinama mora da radi. O tom problemu i mi kao lokalna zajednica moramo da vodimo računa, ne možemo puno da utičemo ali možemo recimo kod upisa u srednje škole da vodimo računa, da forsiramo zanate ako neko hoće da to upiše. Jednostavno da pokušamo na neki način da budemo na usluzi privredi da bih smo zadržali ovaj trend koji imamo. Negativno je i to što imamo iz godine u godinu manje posticaja u poljoprivrednoj proizvodnji. U ovoj godini u odnosu na prošlu imamo oko 14 % manjih posticaja u poljoprivrednoj proizvodnji što je jako veliki procenat i već sam o tome govorio i stalno o tome govorim da se poljoprivredna proizvodnja gasi, nestaje, zemlja nam ostaje neobrađena a u privrednoj grani poljoprivreda igra važnu ulogu. Ako pogledamo tamo iz ovih Izvještaja informacije i tabele gdje vidimo da je gubitak poljoprivrede iz godine u godinu firme koje se bave poljoprivredom prikazan je gubitak. To je nešto o čemu zaista trebamo da vodimo računa i zato sam rekao da je dobro i pohvalio Gradonačelnika što je našao shodno da u rebalansu ubacimo i tih 15.000 KM podsticaja za ove farmere i stočare i o tome mi kao Gradsko vijeće zaista treba da vodimo računa. U suštini mi ovu Informaciju podržavamo i vjerujem da ćemo zajedno i dobro je da imamo i ovo lokalno ekonomsko Vijeće koje smo oformili i trebali bi da imamo jednu čvršću saradnju zajedno sa njima i da zajedno sa njima kroz uključivanje ovog privatnog i javnog sektora da pokušamo da iznalazimo rješenja u cilju zadržavanje statusa koji Grad Gračanica ima u privrednim kretanjima u BiH“.

Gradonačelnik Nusret Helić je predložio jedan zaključak:

„Mislim da uz ovaj materijal možemo jedan zaključak. Znae da imamo problem sa snabdjevanjem privredne zone sa električnom energijom i to ide kilavo i ja bih zamolio da odavde zaključak zbog daljeg razvoja privrede i kapaciteta koji su evo pozitivni, da tražimo od

Elektroprivrede da dodatno poduzmu mere da se obezbjede odgovarajuće količine energije za našu privredu. Mislim da ne bi smetao uz ovaj materijal ovakav zaključak“:

Zaključak koji je predložio Gradonačelnik Nusret Helić je usvojen jednoglasno.

Osman Sulejmanović:

„Pa evo obzirom da Mirsada Čamdžića nisam vidio a trebali bih iskoristiti prisustvo Federalnih poslanika. U Gračanici nisu plate male, nego je malo javnog sektora, a u privatnim preduzećima mi svi dobro znamo da radnike imamo prijavljene na minimalni lični dohodak. Rijetke su firme, čast izuzecima, koji imaju prijavljene radnike na puni lični dohodak. Znači Gračanica nema toliko mali lični dohodak u stvarnosti, treba Federalne poslanike da iskoristimo da probaju smanjiti obaveze na plate kako bih i mi prijavljivali na veći dohodak“.

Hasan Puškar:

„Ja tražim da se još jedan zaključak uvrsti ako može. Tragom Osmanove diskusije, da ne bih bilo Osman sam sebi kopa jamu. Da se odvoji koliko je radnika u javnom sektoru, koliko u realnom sektoru po područjima. Pa recimo Grada Gračanica i Grada Sarajevo, pa da onda pravimo prosjek plaće i da vidimo gdje je veća a gdje manja. Da odvojimo realni sektor i javni sektor, pa gdje je 80 % u javnom sektoru rade a u realnom 20 %, a u Gračanici je možda kontra. Pa da onda vidimo gdje je prosjek plaće veći i takvu neku informaciju treba tražiti. Znači da se odvoji realni i javni sektor, pa da vidimo gdje su plate po 3.000 ili 4.000 KM, a 80 % njih radi u javnom sektoru, a u Gračanici 80 % u realnom sektoru pa da vidimo onda prosjeke. Neku informaciju tražimo za ubuduće da bude u Informaciji i to uvršteno“.

Zaključena je rasprava.

Sjednica je završena u 12,00 sati.

ZAPISNIK VODIO
Iljazović Hazim

PREDSJEDAVAJUĆI
GRADSKOG VIJEĆA
Nihad Krajinović